

**Uunga siunnersuut: Namminersornerullutik Oqartussat missingersuutaat pillugit Inatsisartut inatsisaata allangortinneqarnera pillugu Inatsisartut inatsisaat nr. X, x. november 2009-meersoq**

/Aningaasaqarnermut Naalakkersuisoq)

**Saqqummiussissut**

(Aningaasaqarnermut Naalakkersuisoq)

**1. Siullermeerinnineq**

Siullermik Naalakkersuisut sinnerlugit Inatsisartut qutsavigissavakka siunnersuutip uuma piaarnerpaamik oqallisigineqarnissaa akuerisimammassuk. Aningaasanut inatsisissap akuersissutigineqarnissaata kinguartinneqartarnera qaqutigootorujussuuvoq, ukioq mannali tamanna pisariaqarsimavoq ullut ataatsimiiffiusussat akulikippallaartumik inissinneqarsimanerisa kingunerisaanik.

Missingersuussiortarnermut inatsimmi allassimavoq Aningaasanut Inatsissatut Siunnersuut kingusinnerpaamik 15. november akuersissutigineqareersimasassasoq. Taamaattumik ukioq manna pingajussaaneerinninnissaq 13. november pisussanngortinneqarpoq. Taamaakkaluortoq aalajangiiffigisassatut inatsisissatullu siunnersuutit arlallit Aningaasanut Inatsissatut Siunnersuummut sunniuteqartussat Aningaasanut Inatsissatut Siunnersuutip akuersissutigineqareernerata kingorna oqaluusserisassanngortinneqarsimmapput. Siunnersuutit pi-neqartut Aningaasanut Inatsissaq aqutugalugu akuersissutigineqareersimasut itigartitsissutigineqareersimasulluunniit Aningaasanut Inatsissamut naapertuutinningsumik suliarineqarpata tamanna aningaasaqarneq eqqarsaatigalugu naalakkersuinikkut annertuumik kingunerlutsitsinnaavoq.

Tamanna tunngalugu Aningaasanut Inatsissap akuersissutigineqarnissaata ullut ataatsimiiffiusussat kingulersaani pinissaa Naalakkersuisut kissaatigaat.

Aningaasanut Inatsisissap akuersissutigineqarnissaata kinguartinneqarnera suliassanut allanut piffissalersorneqareersunut aamma sunniuteqassaaq. Tassani pineqarput nuna tamakkerlugu kommunikkaartumillu akileraarutissat meeqquerivimmiititsisarnernilu akiliutissat annertussusissaasa aalajangiiffigineqareersimanissaanut piffissaliussat. Tassanittaaq

eqqarsaatigineqarput kommunit missingersuutaasa akuersissutigineqareersimanissaannut piffissaliussat.

Inatsissatut siunnersuut aqputigalugu pineqartut akuersissutigineqarnissaannut piffissaliussat sivitsorneqarput. Aningaasanut Inatsissatut Siunnersuutip pingajussaaneernissaata kinguartinneqarnerani ullut amerlassuusaa amerlaqataanik kinguartitsisinnanissaq ajoraluartumik periarfissaqarsimanngilaq.

Tamatuma kingunerisaanik kommunit aningaasanut inatsisissap akuersissutigineqarneranit ulluni 10-ni periarfissaqarlutik missingersuutitik akuersissutiginiartussaavaat, nalinginnaasumik ulluni 15-ini pisaraluartoq. Naalakkersuisut nalilerpaat, tamanna pissusissamisunnigikkaluartoq, taamaattorli piffissaqarluartut, missingersuussiornissami tunngavissat amerlanersaat ilisimaneqalereersimassammata.

Piffissaliussaq suli sivitsorneqaqqikkaluarpat akileraarutit allagartaanik tunniussinissat kinguassagaluarput. Taamak pisoqarneratigut kommunini akileraarutip annertussusaanik allannguisussajunnartuni akileraarutip annertussusaa kukkusoq aallaavigineqassaaq. Tamanna akileraarutit allagartaasa naqiternerinut allaffissornikkut sulisitsisunullu suliakkersuutaanerata saniatigut utoqqalinersiutisialinnut juulli sioqqullugu siumoortumik utoqqalinersiutisussanut tamanna eqquissaaq.

Naalakkersuisut nalilerpaat missingersuutitik pilersaarusiornissamut piffissaliussap sivikillinissaa utoqqalinersiutisiallit kukkusumik aningaasarsitinnissaanit ornigunarnerusoq, aningaasammi innuttaasut pisartagaat anikitsumilluunniit alanngortinnerat inunnut pineqartunut annertuumik sunniuteqartarmata.

Naalakkersuisut neriutigaat siuliani saqqummiunneqartut partiinit isumaqatigineqassasut, suliassarlu inatsisartunit akuersaarpaluttumik suliassanngortillugu.